

MUNDO DI MUSICA

Skirbi pa Joy Kock

Varios bez ta pasa na nos hotelnan tin shownan medio-cre. Tambe nos mester admitti cu tin biaha ta bin shownan internacional hopi bon, principalmente den temporada alto cu ta December 15 pa April 15. Locual ta tristo ta pa presencia ta shownan cu nan background music ariba tape (cinta).

No solamente e ta hacie un show barata pero tambe e tipo di shownan asina aki ta kita cupo di trabao pa musiconan. Ultimo tempo nos por a mira na Aruba Palm Beach Hotel un revue cu bailarinanan local. Esaki ta algo positivo. Tur areglo musical a wordo haci pa Oscar Serrano, Director di Third Dynasty. Conjuntamente cu un cantante local e grupo aki cu ta The Arubean Revue, a trece diferente bailenan internacional, pero mas importante ta cu nan a trece bailenan manera waltz, tumba y un parti di Carnaval di Aruba cu musica adecuado cu ta e roadmarch di aña pasa. Tur cu musica bibo y nada di tape. Diferente sala yen e shownan local aki a trece y nos palabra di elogio ta bay na e bailarinanan Annelies van der Windt, cu ta un sublime bailarina, Lydia Muller, Karina Werleman, y Laipong Chon tur bailarinanan cu ta move cu hopi gracia y sumamente profesional.

Varios luna pasa Simadanza a trece un tremendisimo show na Americana Hotel. Nan tabata yena sala tur anochi y e show a ser acompaña pa Super Nova bao di direccion di Raffy Camacho y un parti ariba tape cu nos ta spera cu den futuro tambe lo bira musica bibo. Turistanan a comenta masha positivo tocante e bailenan di Simadanza. Aruba a demostra cu e por!

Cantantenan local cu sigur merece mas show aki na Aruba ta: Sharon Rose, Efre Benita, Lloyd Baptist, Edwin Abbath, Raul Castillo, cu a bandona Aruba siman pasa pa falta di trabao, Claudius Philips, y hopi otro mas. Lloyd Baptist sigur ta e entertainer cu mas experiencia na Aruba. Lloyd su charisma ta permitie pa conta chistes, improvisa segun e publico ta bay cune, y sobre todo e ta un bon cantante.

Sharon Rose su experiencia ta hopi grandi y Sharon tin e record di yena e nightclub L'Esprit di Holiday Inn. Sharon ta un cantante cu ta sacrifica hopi y su preparacion como cantante profesional ta completo cu excepcion cu su unico punto ta un poco debil ta ora e ta papia cu e audiencia e no ta capta nan atencion cu manera ora e ta canta. Cu tempo hayando mas experiencia nos ta sigur cu Sharon lo kibra e barera aki tambe. Semper ta un placer pa scucha Sharon canta. Efre Benita ta un bon compositor. Formando duo cu Sharon, esta Duo Melao, nan tabata tin exitonan grandi na Corsow. Mas grandi cu ariba nan propio isla. Efre como solista tambe ta haciendo un bon trabao na hotelnan.

Pa un cantante converti den cantante di shownan na hotel, nan mester inverti por lo menos un tres mil dollars na areglo musical mas un paar di mil dollars na trahenan. Converti den un entertainer ta rekeri hopi preparacion, entre otro presencia otro shownan internacional, tuma tips for di otro interpretenan, desaroya bo propio estilo, sigui lesnan di canto pa perfecciona intonaciona y hopi hopi training. Aki nos mester remarca cu Aruba Palm Beach Hotel ta e hotel cu mas ta contrata artistanan local. Banda local si no tin na e hotel aki.

Ta recomendable pa tur hotelnan na Aruba cuminsa pone shownan cu grupo di baile local y cantantenan local. Nos gobernantenan por yuda atravez di limita shownan di exterior dreña Aruba. Si en caso tin hotelnan cu por ta contra shownan local, por lo menos por haci e shownan mixto, esta internacional y nacional. Pakico no?

Otro entertainer cu hopi clase ta Vincent Mardenborough. Vincent su show di limbo ta excelente, e ta un basta bon cantante y e sa con pa papia cu un publico. Limbo

Sigui lesa pag. 13

MUNDO DI MUSICA

Cont. di pag. 4

show no ta di Aruba. Limbo a origina na Trinidad, mescos cu steelband. Nos mester tin aprecio si pa tipo di shownan asina aki como cu e ta Caribense. Si nos articulo ta bay tocante posibilidadnan pa nos artistanan y grupo di baile anto ta na su lugar pa pone shownan di bonbini na e terminal di waf grandi y na aeropuerto ora cu turistanan ta yega Aruba. Un show chikito di 20 minuut mas o menos cu un grupo di baile cu trahenan nacional o den costum di carnaval cu musica bibo y no ariba tape ta algo cu sigur e turistanan lo aprecia. Tur esakinan por! Ban traha shonnan.

E bonbini festival na Museo Historico Arubano cu ta keda den Fort Zoutman ta algo di elogio. Laga nos spera cu e lo no bira manera Watapana Festival caminda tur tipo di musica internacional ta ser toca entre otro merengue, calypso, etc. Nos ta spera cu e festival aki lo keda cu su meta di promove cultura Arubano.

Nos ta dreñando den un era cu ta turismo lo mester bira e pilar di nos economia. Turistanan ta bini Aruba pa presencia algo cu ta di nos. Si hotelnan pone discoteca den nan nightclubnan, anto e turista lo pensa cu ta mihor el a keda su pais, caminda discoteca ta algo cu ta bayendo fo di moda y mayoria di discoteca ta centro di droga nan a bira. Un turista ta bini Aruba pa disfruta di solo, beach, casinonan, aprecia e bon manera di Arubianonan y siña conoce algo di nos cultura. Nos mester traha hunto pa crece turismo cu ta nos porvenir.

Den Time Magazine di April 22, 1985, a sali un articulo interesante tocante turismo. Den e articulo aki Caribe, pues Aruba tambe, a haya un sla formal na momento cu nan a comenta cu Caribe ta hopi caro. Textualmente a ser publica: Even the high priced Caribbean enjoyed a 100 percent increase in tourists this winter.

Aunke tabata tin un subida di 10porciento den turismo di Caribe, e palabra high priced ta core cu turismo. Un publicacion asina den Time Magazine ta sali rond di mundo y no ta nada bon pa nos, maske cu e revista a generaliza, esta di skirbi Caribe y no Aruba. Den e mesun articulo aki ta mustra cu bayendo Europa ta sali un Americano bastante mas barata.

Laga nos awor cu ta bini hopi mas hotelnan na Aruba pone bon cuenta cu e prijsnan alto. Oficina di Turismo, bao di guia di e dinamico Dr. Rory Arends, ta haciendo nan maximo esfuerzo pa sigui subi nos turismo. Nos ta opina cu aparte di oficina di turismo mester bin comisionnan institui door di Gobierno pa tin contra ariba prijsnan cu ta alto di mas, contra ariba shownan, servicio y seguridad pa turismo, refiriendo ariba e diferente robonan y atraconan cu tabata tin ultimo tempo.

Ora un turista laga Aruba e mester keda cu e impresion cu Aruba ta un isla sumamente culto. Cada turista cu laga Aruba satisfecho cu nan estadia ta converti den e mihor propagandista pa nos. Si turismo bay bon tin cupo pa trabao y economia di Aruba ta bolbe subi y nos lo yega nos standard di bida back manera cu e tabata t y hasta mihor, ta keda na nos mes.